



L'aula dalla casa da scola ei stada stignada pleina durant la vernissascha.

FOTOS A. BEELI

# Art – cun otg canzuns romontschas

Vernissascha dil project «musica romontscha.art.affons» a Laax

DAD AUGUSTIN BEELI / ANR

■ (anr/abc) **Vendergis ei stau la vernissascha d'in grond project dalla Scolaviva Laax. 180 affons ein sefatschentai dapi il fevrer cun otg canzuns e cun transponer quellas en maletgs, sculpturas, installaziuns ed autras fuormas digl art.** Ils dus artists *Yvonne Gienal* e *Luis Coray* han realisau a Laax in grond project d'art per e cun affons. Igl ei il pli grond che la Scolaviva Laax ha realisau entochen oz. Vendergis sera han ils affons giu tschaffen da presentar quei ch'els havevan creau ils meins e las jamnas vargai. Els ein sefatschentai cun art e musica romontscha en diversas fuormas e dimensiuns. L'emprema part dalla vernissascha ei stada ell'aula dalla casa da scola Grava. Leu ha la 5avla classa cantau la canzun «Unics», il musicist *Pascal Gamboni* ha accompignau personalmein ils affons. L'ovra en fuorma da pop-art cun quei tema han ins saviu admirar vid la preit ell'aula. La secunda scoletta da Laax ha cantau vigurusamein la canzun ladina «Il bös-ch rumantsch». Ils pigns ein s'occupai durant il project culla statteivla plonta, la ferma canzun da *Linard Bardill* ha inspirau la creativitat. Otg canzuns (mira scaffa) han animau mintga partizium. Sco Coray ha declarau alla fin ha el stuiu surstar ch'els affons han luvrau meinsvart vid lur project cantond ensemen la canzun empalonta da lur classa. Ils divers ateliers han pretendiu ina pulita organisaziun e logistica. Sco las duas moderaturas dalla vernissascha, *Sina Brunold* e *Sabrina Bass*, han puntuau ei quei stau pusseivel grazia a divers sponsurs ch'han viu il senn ed effect persistent dil project. Igl onn da scola current frequentan ro-

dund 180 affons scola e scoletta a Laax. Tuts, igl entir menaschi, naven dallas scolettas e scola primara Laax e Falera, sco era il salem superior Laax-Falera-Sagogn-Schluain ein stai cumpigliai enten cumbinar art figurativ e musica romontscha. La secunda part dalla vernissascha ei stada ella casa da cultura Cularta. Leu, circumdaus dallas ovras da diversas classas, ha

Coray presentau ina performance originala, ina mischeida da sault e musica. Suenter la vernissascha han ins caschun da visitar l'exposiziun dallas ovras tochen e cun vendergis, ils 24 da matg. Quella sera ei la finissascha festiva dil project. Giganto vegn ad esser presents, las classas vegnan a cantar ulteriuras canzuns romontschas.

## Las classas e lur ovras

### Aula dalla scola

- 5. classa, scolasta Marina Bearth – «Nus essan unics» da Pascal Gamboni  
Teppi da bustabs
- 1. superiura, Patricia Cadruvi e Peter Blumenthal – «Stagiuns» da Mattiu Defuns  
Unviern, dutg e neiv a moda abstracta
- 3. superiura, Irena Mark e Corsin Caduff – «Siemis» da Liricas Analas  
Maletg monumental cun 25 scenas ord il video
- 2. superiura, Patricia Cadruvi e Rico Deflorin – «Mumma» da Mattiu Defuns  
Installaziuns e tegias cun teila e roma
- 4. e 6. classa, Serafin Sgier e Christin Caduff – «Siemi» da Gion Balzer Casanova/Silvana Candrea  
Maletgs cullas tematicas aua, pasch, nutriment, medicaments eav.

### Cularta

- 1./2. scoletta Falera, Regula Casanova – «Sault dils animals»  
Maletgs e cumbinialas
- 1. classa Falera, Ladina Bearth – «Lein far legher», canzun populara  
Maletgs e cubus cun 54 surfatschas
- 2. scoletta Laax, Riccarda Camenisch – «Il bös-ch rumantsch» da Linard Bardill  
Spërts da plontas cun fatschas
- 2. classa Falera, Angela Deflorin – «Salep e la furmicla»  
Furmiclas ord fildirom, maletgs cun scenas
- 1. scoletta Laax, Barbara Rupp – «La canzun dil bau»  
Baus ord arschella e baus ord plats da carn
- 3. classa Laax, Roger Alig – «La canzun dil bau»  
Seria da pop-art e baus gigants



Ils iniziants dil project Yvonne Gienal e Luis Coray cul cantautur Pascal Gamboni.



Roman Casutt ed Eric Derungs avon l'ovra complessiva da lur classa, 25 maletgs culla canzun «Siemis» dallas Liricas Analas.



«Il bös-ch rumantsch» ha inspirau la secunda scoletta da Laax da far ils spërts ella roma.



«Nus essan unics»: Marina Bearth muossa l'ovra da ses scolars dalla 5avla classa.



La 5avla classa durant ch'els contan la canzun «Unics» cun Pascal Gamboni.



Quels dus baus gigants avon la Cularta han ils scolars astgau colurar.